

八指頭陀詩集

八指頭陀詩續集卷八

釋敬安寄禪

接待寺納涼感舊並速圓公還天童二首

庚戌

到此清涼境能銷熱惱心如何明月夜勝我碧松陰品
竹思前事聞蟬憶舊吟卅年一彈指兩鬢雪霜侵
圓公吾舊侶曾掩萬松關一別玲瓏石長辭太白山巖
花空自笑詩草共誰刪便欲運神力携君天際還

從接待寺過寶明庵訪文清庵主

晨辭接待寺午過寶明庵欲適閒鷗性來從老宿談高
樓涼近水疎簾睡初酣一笑契禪悅園蔬味亦甘

淡淡烟波愜素心
數竿脩竹自搖陰
門前一片菱花水
六月寒生暑不侵

寄題陳伯嚴吏部散原精舍詩集

吾家詩祖仰涪翁
獨闢西江百代宗
更有白頭陳吏部
又添波浪化魚龍

一卷人天殞泣辭
風雲態演五洲奇
欲攀太白掬滄海
洗我雙眸讀子詩

述懷一首呈張蹇翁

滿眼黃埃焉足云
古懷鬱鬱試告君
山林有時得壯士
巖壑無底眠孤雲
嶽靈朝亡谷神醉
秋鬼夜哭春人聞

欲驅雷火掃荆棘使我蘭桂長清芬

贈尊美律師送其入都請經

并序

師昔年與余住岐山親炙恒志老人同參最久
杜多成行忍辱爲糧乘戒俱急冤親等慈實我
法中之芬陀利也住持昭陵點石庵數十年破
屋中置一繩床風雨不蔽猶禪誦自若而四來
不拒一粒同殮道風所被遂成叢席惟無經藏
莫窺秘要法顯求法之誠元奘請經之願師蓋
懷之久矣庚戌夏師將持錫入都求頒西竺靈
文以配南嶽大藏遠來天童與余話舊因留山

中度夏曾自次一日師入室告別余憫其臘之
高又嘉其志之堅慨然爲截句十四章贈之至
師久遠不退之心苦行薰脩之德則非世間伽
陀所能盡述也

昔時同住尙朱顏今日相逢鬢已斑四十年來知識盡
白頭垂淚話岐山

志公塋院綠陰中法會人天轉瞬空憶得上堂剛一喝
至今猶覺耳雙聾

惟師衣法得真傳不記蒲團幾個穿烟水徧參心未已
逢人還乞草鞋錢

多生忍辱運悲深刀割香塗不動心蚤蝨紛紛來乞食

捨身爲彼立叢林

師嘗蚤蝨滿身有爲去之者師笑曰我已捨身爲彼叢林汝何催單違我

願本

錫杖繩床手自將廣行方便作津梁欲知德及昆蟲細

看取隨身濾水囊

師行頭陀錫杖繩床自隨恐水中有蟲先以濾水囊濾之乃飲

欲登彼岸出沉淪護惜淨囊眼目珍毫髮尸羅雖有犯

佛前自懺淚沾巾

聞師行脚宿山庵飢喫拳頭味亦甘月出窺園猶拔草

令人思念每生慚

師行脚至一庵投宿拒而不納且棒喝交至師恬然受之猶乘月爲之拔

草庵主見而悔

乃向師禮懺

舟行杯茗不沾脣恐穢江干瀆水神福盡祇應還受報
金鎗馬麥亦前因

洞庭南望是昭陵行盡雲山不見僧師獨於茲傳祖印
一燈能續百千燈

點石庵中苦異常平居十日九無糧惟將一滴曹溪水
散作醍醐上味嘗

貝多無語地無靈欲請琅函謁帝廷記取松枝東向日
看君白馬又馱經

一餅一鉢入京師雲水飄然海鶴姿敢向聖明求賜紫
田衣三事老堪披

龍鍾雙袖涕洟瀾，世事茫茫後會難。
惟有青天一輪月，與君千里總同看。

他時再住祝融峯，雲海相期盪此胸。
芋火巖前來訪舊，

共攀天柱踏芙蓉。

天柱芙蓉俱南嶽峯名

自題冷香塔二首

并序

庚戌孟秋余卜天童青龍岡，營造堵波爲將來。
大寂滅場松竹之隙，補種梅花，顏曰冷香書白。
梅舊作於壁，題二詩紀事。

佛壽本無量，吾生詎有涯。
傳心一明月，埋骨萬梅花。
丹嶂棲靈窟，青山過客家。
未來留此塔，長與伴烟霞。

湘中舊主六名山

衡州羅漢南嶽上封大善長沙澗山神鼎上林六寺

太白重來

鬢已斑南嶽馬駒空應識西河獅子老尤頑

傳燈錄有南嶽馬駒

西河獅子公案余近兼任甯郡西河營之觀音寺

未除文字多生障那得林泉

半日閒却喜世緣休歇盡一拳打破萬松關

感事二十截句附題冷香塔

并序

余既自題冷香塔詩二章以代塔銘活埋計就

泥洹何營一息雖存萬緣已寂忽閱邸報驚悉

日俄協約日韓合併屬國新亡強鄰益迫內憂

法衰外傷國弱人天交泣百感中來影事前塵

一時頓現大海愁煮全身血熾復得七截二十

章并書堵波以了末後嗚呼君親未報象教垂
危髑髏將枯虛空欲碎擲筆三嘆喟矣長冥

一丁不識箇村夫祇把心田自力鋤忽解翻身作活計
狂吟浪湧洞庭湖

飄然雲水一孤舟重到江南訪舊遊吳越山川尋未遍
又携明月過滄洲

我是虛空無住禪烟雲過眼少流連如何一掃玲瓏石
面壁功夫九載圓

牧牯瀉山憶往年崢嶸頭角劣難鞭自從鼻孔穿純後
短笛橫吹牛背眠

清關橋上氣澄清
悟得無生無不生
黃土穴爲文字塚
青龍岡作涅槃城

六十年來老比丘
磨磚作鏡閱人愁
何如無縫塔中去
心印光潛照用收

佛海風波見已頻
慈心不咒毒龍馴
收帆到岸渾無事
了却浮生夢裏身

四大原空一息存
黯然猶自對松門
生來死去無遺憾
惟有君親未報恩

松關微月又黃昏
空爇爐烟一縷魂
杞氏憂天天不語
波句謗佛佛無言

落月哀猿不可聽
聲聲欲喚國魂醒
莫教遺恨空山裏
誰認呢鵑望帝靈

漫效先賢歌采薇
風雲變幻古今違
夷齊若使生斯世
何處西山叩馬歸

鯨吞蠶蝕各紛爭
未卜餘生見太平
石爛海枯真有日
生天成佛若爲情

脩羅障日晝重昏
誰補河山破碎痕
獨上高樓一廻首
忍將淚眼看中原

聯盟無奈島夷強
合併何堪屬國亡
欲鞏皇圖憑佛力
白頭垂淚禮空王

留願他生入轉輪化爲摩竭大魚身能將鐵甲藏鱗甲
始信神州尙有神

欲膾樓蘭肉飼蛟好興雲雨洗腥羶一輪獨照諸天淨
列宿爭趨北斗朝

茫茫滄海正橫流卍石難填精衛愁誰謂孤雲意無着
國仇未報老僧羞

法運都隨國運移一般同受外魔欺踏翻雲海身將老
獨立人天淚自垂

夢叩西方白玉扁牟尼寶殿倚空冥殷勤稽首逆臺佛
請說仁王護國經

大法垂危無力持
西風兩鬢颯如絲
何當早赴蓮池會
九品花中占一枝

萬事都歸寂滅場
青山空惹白雲忙
霜鐘搖落溪山月
惟有梅花冷自香

入市

偶着芒屨出寺行
勞人塵事便從橫
百千蚊蚋聚成市
但聽啾啾雜亂鳴

贈張蹇翁二首

蹇翁真是慈悲佛
語及民艱淚卽流
痛念黃巾皆赤子
兵符臨發又還收

遜翁

朱子別號

學佛謗佛者公亦理學非其人安排不喫冷

猪肉敢現金剛護法身

寄范清笙舍人楊雲門明經一首

并序

五夜一燈相對枯坐忽憶甬上舊遊殂謝殆盡
惟范舍人楊明經健存因爲一絕句用寄二人
使知我學佛者非真無情人也明經一號長庚
故末句及之

一燈黯黯照愁明五夜悽悽感舊情
滿眼繁星盡搖落
惟留殘月配長庚

易實甫觀察自肇慶道署寄贈羅浮棕拂瓊州椰

扇作此奉謝却寄

應怪維摩默不言
遠將談柄寄松門
拈來欲說西來意
便覺波濤海口翻

炎炎火宅鬱無涼
忽被仁風喜頌揚
赤日當天不知暑
白蓮隔水但聞香

有客三首勸戒殺也

有客有客肆歡譎
白馬橫馳氣薰灼
捕雀僧寮僧豈樂
對佛傷生供大嚼
佛雖無言佛淚落

有客有客胡爲乎
公然酒肉入僧厨
杯盤狼籍興有餘
又捕放生池中魚
池魚欲逃池水枯

池魚忽泣作人語曰客曰客吾語汝我亦曾作富家子
汝曾爲魚登我俎今我爲魚填汝肚

金陵重贈義甯陳吏部

一別長沙碧浪湖西風兩鬢各蕭疏江山所遇非故物
歲月相爭成老夫天際白雲隨杖遠尊前明月照心孤
他年肯入蓮花社不待攢眉酒可沽

庚戌八月南洋勸業會場湖北館觀樊山布政督
鄉人摹搆黃岡竹樓因題

與可胸中幾根竹樊山千竿萬竿綠仍呼此君造此樓
黃岡却在鍾山麓我欲借乘黃鶴遊還留鶴背負黃州

飄然直渡南溟外
斫竹誰能更作樓

又觀所狀赤壁卧龍岡黃鶴樓諸古蹟再題二絕

句

三分事業且休言
赤壁何因下白門
要與卧龍通一語
莫從形勝論中原

武昌城西黃鶴樓也
赴南洋賽會游若有仙人吹玉笛
梅花應落石城頭

又觀菊花會一首

看罷深黃又淺黃
枝枝葉葉競斜陽
似邀萬億陶彭澤
同到江南醉晚香

題王梧生戶曹所藏韓人金醉堂詩卷二首

欲向西山歌采薇白雲心事與時違誰將東海孤臣淚
吹上南朝舊衲衣

國破身存恨若何遙憐荆棘泣銅駝降王却愛魏宮妓

壯士空悲易水歌

謂安重根
刺伊藤事

送俞格士學使之官甘肅

異域豈云樂君恩有此行黃花秋漸老白髮病微生荒
戍落寒葉邊笳飛遠聲郵籤隨雁遞關吏候雞迎問水
知涇渭看雲憶弟兄憐君持使節萬里到長城

江南重晤李梅庵學使二首並約九日掃葉樓登

高

秋風吹桂棹重到石頭城坐對黃花晚微看白髮生幽
情閒自遣宦味薄彌清喜近重陽節高樓掃葉迎
相交二十載結契亦云深自適孤雲意聊存出世心債
多惟典帖靜極不鳴琴應愛枯禪至清言愜素襟

俞園觀李提學書楹聯有贈

吾憐李翰林一字抵千金看寫澄心紙如聞焦尾琴清
風滌殘暑落日動微吟坐覺楓林晚蕭森秋夜深

重陽日夢與王梧生戶曹李梅庵俞恪士兩學使
蕭稚泉少尉登掃葉樓分韻賦詩余拈得樓字

立成七律一首覺而不忘錄以紀異並志夢痕
九日重來上此樓青山如舊葉皆秋豈無載酒題糕興
以有攀天蹈海愁強折黃花笑將插却搔白髮短還羞
羣公應抱匡時策早使新亭涕淚收

重陽前三日登掃葉樓有感

向晚欲何適高樓又一臨昏林寒雀噪微月亂雲侵不
醉黃花酒甯知白首心自憐憂國淚空灑道人襟

夏劔丞觀察於六年前枉顧毘盧寺以詩投贈遲

遲未和庚戌九月於陳吏部宅中相遇索和前

作奉酬解嘲

一笑相逢轉愧顏六年詩債不曾還
自憐慧業隨時減莫怪枯僧得句慳
白髮苦吟秋雨外黃花疎冷夕陽間
祇愁綺語磨難淨贏得禪心老未閒

陳師曾自日本歸遇於金陵感而有作

昔日陳童子重逢鬢已蒼萬千餘里別十四度重陽有
口真難說無言轉自傷人間何限事歷歷在滄桑

聞拂塵法師卧病香林寺寄二詩以代文殊問疾
聞道維摩病病生甯有因三災休自苦四大本非真粉
碎虛空骨掀翻大海身却來觀世界此句用楞嚴成語誰我復

誰人

一床方丈卧問疾愧文殊白業修身淨黃花想貌臞安
心原是藥病骨倩誰扶南嶽坐禪日功夫尙在無

余既晤陳師曾感贈以詩師曾亦爲余寫茅菴入
定圖以爲紀念題二絕句於上

一瞬滄桑換劫塵茅菴猶剩苦吟身當時餓虎啣將去
那得爲君畫裏人

念子東瀛學力增歸來道骨鬱峻嶒風濤看盡魚龍舞
猶憶蒲團一箇僧

又題

紅塵不到白雲層竹樹蕭寒水石澄一箇蒲團忘甲子

被人喚作六朝僧

衡陽蕭稚泉少尉爲余作小條幅溪山淡逸竹樹
蕭寒雅有雲林之致題二絕句以志墨緣

淡淡溪山淺淺苔扁舟如葉載雲回瀟湘一片空明氣
都逐衡陽雁影來

江南薄宦亦堪憐大半生涯在硯田一種豪情銷不得
儘收雲海入蠻箋

九日懷王益吾祭酒

今日重陽節遙知載酒游菊花還自插霜鬢祇吟秋謗
與名俱遠官隨病早休浮雲身外事一笑且登樓

贈陳吏部第五郎七截五章

并序

吏部五郎爲長沙上林寺慧舫老宿後身吏部
尊人佑民中丞任鄂臬時一日於衙齋見老宿
忽至轉瞬已渺正驚訝間僕婦報少夫人產一
男合掌跏趺端坐出胎隨函問湘中道俗則是
兒生辰卽老宿寂日老宿行脚時曾住峨眉金
頂有着佛鐙長歌一首後爲成都草堂寺知客
同治初別工部祠堂還湘句云錦水春風公入
蜀草堂人日我還湘楊海琴兵備贈老宿有雪
天歸自大峨來之語老宿平日持不殺戒甚嚴

雪中宿玉池山曾驅一狐陷冰池死常語人曰
此狐與我有七世冤結今又斃其命當入輪迴
與之解釋老宿與余師東老人爲法門莫逆常
指余謂眾僧曰此子骨相不凡後當大建法幢
惜吾老不及見耳庚戌秋余來白下問吏部則
五郎年已十七訪余於毘盧寺一見如故其言
簡氣肅酷肖老宿追憶前塵竟成後會佛說因
緣諦信不疑因爲五絕句贈之

此身未得證菩提羅漢投胎性亦迷後果前因誰省識
天人墜作落花泥

前身汝是慧胎師來作陳家第六兒
記否峩眉金頂夜長看五色佛鐙垂

浣花溪上舊徘徊工部祠荒長綠苔
錦水春風留不住草堂人日却歸來

霜眉鶴髮上林僧一點塵心動未曾
底事雲間成小謫驅狐陷落玉池冰

慧業靈根不等閒要留眞面在人間
待君了却君親事許與梅花共一山

題多竹山太守香雪尋詩圖

城中春尚早林際雪微明月向高枝
隱香從冷處清有

詩尋不見無意句還成識得春來處何須鄧尉行

重陽後一日金陵寄魏學佐太湖

又作江南客蕭然憶舊游微霜洞庭葉殘照秣陵秋問
訊重陽節登高何處樓白衣應送酒曾插菊花不

題王梧生戶曹粵西從軍紀畧

王粲從軍賦遠游桂林風景一囊收因知豺虎深藏穴
欲駐熊羆每運籌銅柱秋高飛鳥沒珠巖日落暝猿愁
伏波橫海登壇處古蹟於今尙在不

夜讀樊山集奉題

細讀樊山句子奇林鐘敲盡夜遲遲傾心湘綺追黃綺

公極推重
湘綺先生
高步微之與牧之華嶽蓮花森道骨白門楊
柳吐秋絲祇嫌百首紅梅艷奪我茅菴冰雪姿

馮君木开病中以詩見寄作此問訊兼柬天仇慘
佛

男兒若箇有熱血惟子丹壑常爭流豈比文園惟病渴
應同杞國有奇憂次復傷心憐慘佛更無可忍念天仇
道人短髮欲繫日迸泣空山搔白頭

九月晦日還山夜坐憶君木天仇慘佛得四絕句
君本身才四尺餘可知其心包太虛山河大地復何物
渠正是我我非渠

君木爲詩瘦且寒
臞松病鶴相對看
窮冬絕粒茅簷下
祇嚙梅梢雪一團

慘佛悲人常自哭
袖裏須彌不忍緣
天仇之仇不可忘
問天無語天心傷

慘佛知心卽是佛
佛與心兮無二物
天仇觀佛亦是仇
提劍欲斬心之頭

殘臘登掃葉樓次去年九日原韻

今日重登掃葉樓
西風吹盡秣陵秋
山川歷歷平生感
禾黍離離故國愁
殘雪暗添衰鬢色
梅花應爲老僧羞
逃空那得空王法
儘有哀時淚未收

訪洪復齋居士家洵

幽居在人境車馬日閃閒遠近天邊棹仍歸甬上山孤
雲飛已倦獨鶴喜初還歲暮來相訪蒼松識古顏

西湖過松風上人爲學捨身之塏哭之以詩

辛亥

爲學捨身者松風老上人獨留孤塏影長與古墳鄰碎
骨亦何有招魂恐未眞湖邊春草碧而我益沾巾

杭州白衣寺苦雨不寐

譙樓鼓聲咽積雨黯重林似洒天人淚如傷佛祖心潮
橫孤艇立愁入一燈深寂寂不成寐神州恐陸沉

過楊雪漁太史故宅晤其公子見心舍人作此奉

贈

幸草亭前草

太史有幸餘詩
草因以名亭

春來又發芽
天風吹海色

野衲到君家
坐久爐烟細
堂深燕語譁
禪心了無着
靜對白梅花

包協如舍人以其友李商山君弔女弟子花月痕
詩見寄爲題二絕句於後

月湖湖上有人家
十五雛姬鬢始鴉
不許紅塵侵玉骨
野風吹落白蓮花

紫蘭香淨掩重門
省識鬢天小謫魂
莫向湖邊歌懊悔
鏡花水月偶留痕

重贈洪復齋居士

復齋居士人中龍白髮猶餘兩頰紅
薄醉卧吟蓬島月布帆歸卸京門風
新交應許盧行者老友惟存張蹇翁
準擬明年同攝影長留佳話白雲中

題馮君木并逃空圖

辛亥

我昔在家未學佛愛惜一毛不肯拔
自從割斷煩惱緣四大輕如蛻後蟬
天台南嶽不辭遠長把蒼藤作吾伴
憐君底事禿其頭儼然持律老比丘
百八牟尼手自握一條布衲心無求
趺坐空山忘甲子細草幽花盡禪理
安能與我入名山結屋千巖萬壑間
笑問圖中人倘許

君跨肥龍我瘦虎

題洪道法師伴雲居

萬緣俱已寂惟伴片雲居靜聽蓮花漏閒翻貝葉書
七條衣自足一鉢飯無餘古木殘蟬裏茅齋祇晏如

過瑞巖寺再題二首

禪機休外覓普化此搖鈴

寺爲唐普化禪師開山師常搖鈴示人

三秀掇

仙草四圍成翠屏登山雲在屐汲澗月來瓶欲問廣長
舌溪聲好自聽

靈芝峯下瑞巖寺三十年中五度游雲水悠悠忽今日
青山白盡老僧頭

讀書蕉上人遺集感題

細讀君詩夜睡遲卷中多是贈余詩不堪孤墮臨池影
猶似秋巖踏葉時橘柚成林都手種烟霞留約負心期
空山寂歷思前事獨對殘燈淚自垂

仲秋余養疴滬上留雲寺譚萊生公子見訪出詩

索題

颯颯西風病骨侵蕭然一榻卧空林遠勞公子尋秋至
還使枯禪擊鉢吟滄海漫填精衛恨白雲閒話道人心
無生一曲憑誰識欲鼓獅絃覓賞音

華嚴經云如取獅子筋爲絃鼓之眾

絕響俱

讀萊園詩稿有與亡友陳仲鹿洞庭舟中唱和之

作慨然有感再題五律一章

却憐陳仲鹿同泛洞庭舟
贈子詩猶在聞名淚卽流
既來新雨好復動故人愁
未證真空理青山愧白頭

何棠蓀觀察久官蜀中不通音訊逾二十年辛亥
秋遇於滬上感而有贈

長沙一別後雲水久茫然
留滯三巴路遲回兩浙船
驚看鬚鬢改始覺歲時遷
世事眞難說相逢且論禪

遠從黃浦見還憶碧湖游
人事今來變江河亦改流
無由歸白社何處有滄洲
日暮欲誰適閒雲也自愁

寄吳夢舟秀才

並序

余碧湖詩社中人今皆置身清貴惟吳夢舟秀才不求聞達終老煙蘿衆鳥高翔孤雲獨卧蓋玩道有覺之隱君子也辛亥秋寄書問訊情見乎詞追念碧湖之遊彌深白社之感選四十字

以報故人

不見吳季子蒼黃草木更五年成小別一紙見深情長作片雲卧遙憐孤月明何時碧湖社歸赴白鷗盟

聞蜀亂有感

忽報蜀中亂遙徵海上兵幽花含露泣落木感秋聲魚

腹書難達鷺叢路不平遙憐三峽裡處處有猿鳴

八月十七日楊仁山居士坐脫於金陵刻經處詩
以輓之

七十衰翁何所求惟於梵行最清修流通法藏徧天下

卧對半山成白頭垂死祇遺宗教恨

公彌留之際與人談及某處刻經未

善爲遺恨平生不爲子孫憂可堪法弱魔強日又覆迷津一
寶舟

夜雨不寐聞蟲聲感賦二首

草蟲吟復斷百感動寒宵迢遞愁風鶴淒涼聽雨蕉可
憐衰晚世苦憶聖明朝四海日彫瘵來蘇望帝堯

禪心老難遣，獨坐倚枯藤。豈似黃巾擾，應符白水徵。時危爭作將，國變幸爲僧。強制哀時淚，觀空入佛乘。

甬上書感三首

茫茫滄海一孤鱗，忽忽蛟龍起戰塵。不惜諫攀丹檻折，誰憐寒失翠華春。

轉瞬浮雲六代更，須臾唐宋又元明。危亡時事何堪說，落葉殘陽滿帝城。

二百年來王氣銷，野人流淚話前朝。可憐亡國真容易，一霎金風玉樹凋。

遙聞四首

遙聞車馬出京華西望潼關四扇遮今夜月明初駐蹕
翠華何處宿民家

海上滄桑忽變更河山北望不勝情秋風祇剩蘆溝水
猶自潺湲繞帝城

遙望西山王氣終無邊木葉落秋風淒涼最是煤山月
復爲君王照故宮

漢口華夷互市開金銀佳氣鬱樓臺可憐黃鶴樓前望
盡化紅羊劫後灰

題羅迦陵夫人哈同花園

哈同花木亭臺勝帝釋林園恐不如況有龍宮法藏寶

妙香吹滿天人居

夫人園中石印
藏經流通海內

寄懷烏目山僧

心中常有烏目僧，每謁不見應我憎。若憶玲瓏巖竇好，

可來同倚萬年藤。

天童玲瓏岩鬼斧神工，莫名其巧。中產萬年藤，可爲拄杖。

寄章太炎君滬上八絕句並招游天童

我欲致書章太炎，淚痕和墨與之兼。垂危慧命誰堪續，

着意先生妙筆尖。

故人最憶吳彥復，其姊聖慧優婆夷。稱子人中芬陀利，

黃金贖罪勝鬚眉。

君曩因黨禍被逮，彥復姊劉氏聖慧極力周旋，得以解脫。

張商英著護法論裂袂歐陽謗佛言，而君亦有十方告。

君有告十方
宰官居士書
毀蔑戾車植信根

平生未與淨名游
杜口毘那憶勝流
不二法門誰共入
天花落袂天風秋

人海車塵匝地腥
孤根蘭蕙惜芳馨
黃流滾滾春申浦
不及天童一髮青

玲瓏巖在寺之西
咫尺登天不用梯
片石孤雲誰與語
待君來此共幽棲

海上芙蓉列翠屏
謝公游屐未曾經
可知太白爲童子
來與山僧侍拂瓶

松關石徑淨無塵
細草幽花藉作茵
莫怪枯禪多綺語

名山正復要名人

答友人

君問天童勝峯巒接四明寺藏青靄密鐘過白雲清細
草軟敷座幽花難辨名溪聲廣長舌日夜說無生

題王翊君所藏張力臣潔園展禊圖卷

王子

一瞬流光四十春青山如舊白雲新空餘禾黍故宮感
不見蘭亭雅集人塵世滄桑身已老名園觴詠迹俱陳
披圖祇剩王王父落日江南淚滿巾

聞金陵城破李梅菴死難及來滬則已黃冠爲道
士矣

人海事難言風濤大地翻
昨朝哭君死今日喜君存
暫對眞疑夢驚看莫是魂
黃冠歸故里何不入緇門

嶽蓮和尚招余就齋作七古一章奉酬時其師枯

木長老遠出

主人好客殊常情入門一笑心先傾
曼陀花開香滿室
苾芻草秀青連楹
禪悅法喜味自好
眞如妙諦言皆新
枯禪出定杖錫渺古琴
壁掛松風鳴高山
流水神已會
至音希聲誰能聽
雲儀鶴邈不可識
良辰勝地虛此行
欲去却顧童子語
師歸問訊稱余名

遊寶華山慧居寺贈浩淨律師二首

久耳華山勝今行絕頂邊春風微作雪細雨散如烟溪
竹影搖翠山桃花欲然到門聞夜梵松鶴已高眠

清淨蓮華域開山始誌公古人難再見吾道恨何窮此

一作末法道將窮 祇樹彫秋綠曇花怯晚紅憑師持慧澤徧洒

大江東

登拜經臺

栽栽拜經臺去天不盈尺俯視牛首峰半髻烟際碧一
線揚子江縫余衣袖白欲掇三神山爲我四禪宅邈絕
區中緣高棲霞外迹應真期不來巖花空滿席

別德寬律師下山二首

兩宿慧居寺清言得未曾道心堅似石戒律皎如冰
卓誌公錫單傳見祖燈高山聊仰止又下碧峻嶒

禮別干華佛無言淚自零經過黃葉嶺迴望白雲亭

嶺名白雲亭額魔事何紛擾勞生此暫停春風無限意處處柳

爭青

曼衍道人以詩見貽次韻奉酬

春樹團新翠流鶯弄曉音山如睡虎醒海作啞龍吟老
衲來越嶠騷人貽楚琛似携碧湖月照我綠蘿心

附原韻

吃僧狎蛟海自抱鐘磬音冷月侵趺坐乾風吹夜

吟翦魂落島嶼捧記抽天琛悲涕了初地湛湛無
漏心

聞故人秦子質來滬忽於夢中見之即得二詩醒
而錄之以志神交

國變僅有存驚看帶淚痕豈徒人事改亦覺地天翻神
理知仍在浮生休更論心安即避世不必入桃源
此地春申浦相逢已十年滄桑今變矣身世更茫然欲
入四禪定其如百感煎袈裟所漬淚俱是哭人天

西園戒幢寺廣慧長老與其高足三根和尚前後
住持百廢俱新製伽陀四首贈之

姑蘇城外寺名勝擅西園貝葉書盈篋梅花香滿村忘
機魚自樂聽梵鳥無喧物我俱平等風旛不必論
珠塵紛滿眼定慧密持身妙法蓮華淨牟尼寶殿新獅
林遙在望虎阜近爲鄰殊勝吉祥地憑師轉智輪
地接五湖天煙波興渺然龍鼉時出沒鷗鷺影連翩山
碧雲逾淡江清月更圓無情長說法了不落言詮
老未山中卧頻從海上歸馬鳴猶托鉢龍樹已傳衣梵
行修何苦檀施願不違人天共歡喜花雨日霏霏

西園放生池觀魚二首

西園戒幢寺池上偶閑行頗覺羣魚樂同遊一水清臨

淵我無羨洗鉢爾休驚他日成龍去毋忘此放生
春風梅柳自成村潭影閒雲對笑言到此忽生濠濮想
人魚同樂是西園

將往光福看梅聞其地有警不果行

久聞光福地疏冷得春多十里花迎袂連林玉作柯繁
枝殘月墜清影淡煙和欲踏香雪去無如荆棘何

甬上遇法舟和尚次唐人韻二首送其歸竹林寺

憶曾竹林遊一笠斜陽晚山色夢中寒鐘聲雲外遠
君自竹林來碧桃花已晚且話白雲心青山歸未遠

常州重晤莊醒菴中丞奉贈四絕句有序

公宦湘最久遺愛在人庚戌湘亂公以藩司署
撫憫民飢鬪荒不忍加誅遂爲總督瑞澂所劾
罷官之日吾湘人扶老携幼哭送其行壬子二
月余來昆陵既喜公存復悲世變以淚和墨書
五絕句贈之

湖南人宦鬢成絲湘水衡雲繫去思煨芋殘僧來訪舊
沾衣如讀峴山碑

澄波如鏡是吾湘不使民飢不鬪荒忍把黃巾坐黎赤
長沙謫去萬人傷

兩湖使節假公持湘漢風清浪亦遲今日武昌楊柳色

春風惟映酒家旗

一從解組入山林
白朮黃精道味深
塵世興亡都不問
梅花開落却關心

結茆擬上最高層
滿目青山絕愛憎
老去交游知更少
應憐雲海一孤僧

贈莊公孫一首

有序

余住南嶽時遣長沙一日謁公不遇適長公子
秉恒方生兒彌月抱見余因效寶誌公見徐陵
故事亦摩其頂曰石麒麟汝又下生自茲歲月
頻更雲海遠隔不復記憶王子春余托鉢毘陵

詣公門見一少年初不識但訝其貌酷似長公
子既詢左右知爲向所見之公孫喜作一詩贈
之

石麟摩頂記吾曾迴首人間歲月增白髮枯禪來問訊
喜看頭角一峻嶒

贈鐘樓寺光忍和尚二首

憇足罷參尋幽居祇樹林拈花微有笑對鏡寂無心不
羨門留帶惟持偈勝金爲君題妙句掃石動枯吟

未證真空莫說空含情傳語白雲中人間盡是繁華夢
輕打高樓五夜鐘

贈清公

我獨知師意人皆目汝狂心光能自照口語未爲妨
忍草經霜勁禪花過雨香炎威空作態一念頓清涼

江南送張聽雲還鄉省母

江南春正好底事忽言歸十載別慈母寸心懸落暉
因憐游子淚頻滴老萊衣使我吞聲哭萱庭幼已違

春夜與樊雲門夏武夷集哭菴聯句

浮杯渡滄海忽與故人逢入談話一燈雪枯禪萬木冬

樊養生同澤雉高詛逐雲龍武髮髯寒山寺來聽夜半

鐘哭庵

周菊人贈詩次韻答之

世變孤雲在春回萬柳蘇本圖成佛祖豈分作詩奴
嗔虎慈心伏癡龍慧劍屠老年耽寂定半偈贈人無

三月十四夜宿茅山寺楊妃伯贈詩次韻奉酬

一簾花影淡煙和如此良宵有幾何擊鉢聯吟宜達旦
片帆明日又煙波

茅山登茹峯亭次轡琴韻

攀蘿重上茹峯亭滿目瘡痍涕自零欲拔靈茅滄海去
中原一髮袖中青

重過茅山寺遙望徐酤仙胡樵硯呂文舟楊雪門

諸亡友墓泣然有作

三茅舊遊地一步一傷心
故人多葬此墓木已成陰
白社復誰在青山獨至今
春風草又綠對此益沾巾

過亡友楊靈荃半灣居愴然作此

半灣春水年年綠每到君家一泣然
三十一年重出世又將霜雪上華顛

贈楊轡琴茂才

君騎竹馬尙紅顏尋我幽花瘦石間
三十一年如電掣白頭相對話青山

石城尋白道人

石城殘照裏楊柳碧餘春獨放青天鶴來尋白道人溪
雲涼入戶潭水近爲鄰坐覺滄洲晚微風動葛巾

王子秋仲龍虎山嗣漢天師張曉初君來滬世界
宗教會開會歡迎與會者西士李佳白梅殿華
及會員會吉人張袞龍陳喆甫夏小谷李體乾
陳植生姚志梁諸君余忝陪座撰爲伽陀以紀

勝會

勝流集如雲歡迎張天師秋風吹海色湛如碧琉璃遠
聞鸞鶴鳴同瞻龍虎姿至理闡微言宏抱開神颶俱融
水乳交永忘種族岐釋耶與孔老相見咸嬉嬉百川既

入海一味夫何疑由來宗教會未有勝於斯

湖南旅甯諸君啟余主席毘盧寺詩以奉酬

毘盧寺是古招提老衲何堪任覺迷漫擬參寥於玉局
更慚島佛與昌黎詩心靜養雲千嶂禪意清餘月一谿
爲訪東林高士語片帆來自浙之西

陳仲思輓詩一首

一夕金風彫玉芝孤禪聞訊淚雙垂元方有弟誠難得
伯道無兒更可悲念與君家交最久身經塵劫死猶遲
嗟余未證蓮花果哭友徒歌薤露辭

自題小像

余建冷香塢於青鳳
山前爲他日瘞骨處

六十二年夢幻身惹人歡喜得人嗔儘容篋戾車成隊
轉與阿修羅結鄰青鳳山前聊葬骨白蓮花裏待棲神
虛空擊碎渾無事大地何曾有一塵

贈別蕭漱雲太史

並序

漱雲太史心痛國殤由湘來甬效魯連蹈海余
以無人無我不生不滅解之既留山中小住復
勸其歸選四十字以爲臨別贈言

甬上復爲別相逢詎有期白雲飛莫定滄海變多奇憤
極休談劍愁來且賦詩興亡俱夢幻勿動道人悲

一自長沙識深知志節堅山河雖已改肝膽尙如前莫

戀滄洲月歸浮湘水船東籬黃菊在猶似義熙年

俞恪士歸自甘肅其弟壽臣歸自遼東俱僑寓滬
上相見各述亂離感而有贈

憐君兄弟共還家遼海天山道路賒遠戍秋風生白髮
十年心事負黃花亂餘還念驚弓鳥國變眞如失樹鴉
塵世滄桑人老大不堪回首憶長沙

與君家兄弟自長沙相識將三十年

再贈恪翁一截句

雪嶺冰河凍不開黃沙白雁使人哀獨携一片關山月
繞盡長城萬里回

壬子九月二十七日客京都法源寺晨起聞鴉有

感

晨鐘數聲動林隙始微明披衣坐危石寒鴉對我鳴似
有迫切懷其聲多不平鷹隼倏已至一擊羣鳥驚恃強
而凌弱鳥雀亦同情滅余鉢中食息彼人中爭我身尙
不有身外復何營惟憫失乳雛百匝繞樹行苦無濟困
資徒有淚縱橫覺皇去已邈誰爲覺斯民

招樊雲門陳伯嚴熊秉三易實甫於滬上靜安寺
作重陽會次雲老韻二首

聊具伊蒲進一觴可容秘思訴殘陽遠觀滄海窮千變
欲把青天補大荒雪竇禪機遲且鈍雲門句子澹而香

年來已熟黃梁夢回首邯鄲是覺場

高人原不在登高懶逐龍山載酒勞掃淨空花完月魄

此句一作掃淨
狂花空客慧

銷除結習剩風騷且來塵外開雙眼莫

向尊前嘆二毛黃浦江邊秋正好一籬瘦菊坐吟豪

酬陳漢元參議

久別陳無已相逢鬢已蒼心腸盤俠氣言論凜秋霜力
使邪山倒能生暗海光國家爲柱石我法亦金湯

次前韻再贈陳參議

興亡良有以何問彼穹蒼榮茂三春幹蕭條九月霜終
成大革命不負好時光若論元勲業還須頌武湯

寒夜與吳虎頭坐談仍前次韻奉贈

獨憐吳季子詩骨秀而蒼坐瘦一潭月吟殘五夜霜秋
花無熱艷綵筆有奇光領畧清談味如嘗般若湯

田君梓琴贈詩再疊前韻一首奉酬

流盡英雄血回天力勁蒼近看遼海月應憶洞庭霜共
起民軍義重生祖國光黃農猶可接不獨繼成湯

山居漫興仍疊前韻四首兼答陳參議

山居殊寂歷苔蘚繡衣蒼偶見樹落葉因知天雨霜松
陰看鶴立潭影浴星光君問枯禪味爐燒青菜湯

海橫杖底白天入袖中蒼遠聽猿啼月如聞鬼哭霜巖

松凝冷夢籬菊淡秋光悟得無諍法抽薪止沸湯
手持一片石欲補天蒼蒼萬派潮爭海千林木落霜法
雲期廣蔭慧日更流光洗淨貪嗔穢蓮花生火湯
月照禪心寂苔生佛面蒼詞峯長聳翠忍草不彫霜拭
淨微塵垢圓成大鏡光薪傳火已燼何處更揚湯

八指頭陀詩續集卷八終